



Kamis, 16 Juni 2022

Ogen: Esekiel 41:5-26



Ukiren-Ukiren Rumah Pertoton



Wari sindi sirenungken me kerna ingan si badiana kal, wari enda kerna bagin-bagin rumah pertoton, gedang ras belangna rumah pertoton, batar-batar bage pe pintun rumah pertoton. Bas bagin-bagin rumah pertoton e, terkhusus ingan si Badia ras ingan si badiana kal, kerinana arus ilapisi papan, benaken bas lante nari terus ku jendela. Bagin dingding si arah bas Rumah Pertoton e, mulai i bas pintun nari ku das, iperentahken Dibata segelah kerina ilapisi alu ukiren gambar-gambar e me batang kurma ras kerubim pegancih-gancih.

Bas ingan si badiana kal e, ibahan pe sada tempasna bagi batar-batar kayu. Batar-batar e jadi meja si lit i adep-adepen Tuhan. Kerina si enda kune si bayangkan maka bagunen e enggo tertata mejile rikut ras ukiren-ukiren si enggo iperentahken Dibata. Adi itatap ukiren-ukirena minter teringet kempak Dibata.

Dibata e me Dibata si ratur, arah kai silakoken kerna bagunen rumah pertoton enda ncidahkan maka IA tahu-tuhu enggo leben ngaturken kai saja si perlu ilakoken bas pembangunanen rumah pertoton. Kerina ipersikapken alu mehuli segelah ulihna pe banci mehuli, la terjeng mehuli tapi lit erti sinuate iturikenNa arah ukiren-ukiren siibahanNa e.

Em pentingna rumah pertoton man Dibata. Uga dage kita mpekena-kena dengen njagai kiniulin rumah pertoto. Adi Dibata pe tahu-tuhu mediate kerna rumah pertoton, iarapken pe selaku moria banci mediate ngidah kebersihen ras dekorasi-dekorasi si lit i bas rumah pertoton. Mbelin pengarapen kerina dekorasi e mereken erti simabai perpulungen ngejapken kehadiran Tuhan. Labo asal itamai. Mari bekerjasama ras perpulungen (kategorial sideban) segelah si enda banci silakoken ras-ras.

🕊 Kerina si lit bas rumah pertoton maba perjumpaan ras Dibata